

Ri ruca'n carta ri xutz'ibaj can ri apóstol San Juan

Ri Juan nuhop tzij

¹Yin Juan, ri uc'uey^a quichin ri kach'alal, nintek c'a el re carta re' chave rat vach'alal ri at cha'on roma ri Dios. Nintek c'a el rutzil-quivech ri aval. Can kitzij yixinvajo'.^b Y man xe ta yin ri yinajovan ivichin, xa can yixcajo' chuka' conojel ri ch'aka' chic ri quetaman chic ri kitzij. ²Y roma c'o ri kitzij ri pa tak kánima, romari' nikajovala-ki'. Y ri kitzij xtic'oje' c'a kiq'uin richin jantape'. ³Y ri utzil, ri joyovanic y ri uxlanen ri petenek chila' riq'uin ri Dios Tata'ixel y riq'uin chuka' ri Ajaf Jesucristo ri Ruc'ajol ri Dios Tata'ixel, jari' ri xtic'oje' ri pa tak ivánima.^c Can xtic'ul-vi c'a ronojel re', roma icukuban ic'u'x riq'uin ri kitzij y roma chuka' ri yixajovan.

⁴Yin janíla quicoten xuya' pa vánima tok xenvil chi ri ch'aka' chique ri aval cojkan ri kitzij,^d can achi'el nubij ri Katata' Dios chike chupan ri ruch'abel. ⁵Y vacami vach'alal, ninchilabey c'a chave chi tabana' ri nubij ri Dios, chi can tikajovala-ki'. Y re tzij re' man c'ac'a'^e ta. Xa can jare' ri chilaben-pe chike tok xkanimaj ri Dios. ⁶Y vi can ja ri yerubij ri Dios ri yekaben, can nikajovala-ki'.^f Roma rija' nubij chi can tikajovala-ki'. Y rix ivetaman chi queri' nubij, roma xivac'axaj yan pe tok xinimaj ri Dios.

Can ec'o-vi k'olonela'

⁷E q'uiy c'a k'olonela' yebiyaj chuvech re ruvach'udef ri yebin chi ri Jesucristo tok xpe vave' chuvech re ruvach'udef man xoc ta achi'el roj vinek. Y ri nibin queri' chirij ri Jesucristo, jac'ari' ri k'olonel ri netzelan richin ri Cristo^g y nuben chi can ja rija' ri Cristo. ⁸Jac'a rix ri jebel isamajin-pe ri Dios, tichajij c'a ri ic'aslen, richin queri' man ta xtisach can juba' chire ri lok'olej sipanic^h ri xtic'ul roma ri isamaj. Can ta tz'aket tok xtic'ul.

a 1 P. 5:1. b 2 Ts. 2:13; 1 Jn. 3:18. c 1 Ti. 1:2; Ap. 1:4. d 3 Jn. 3. e 1 Jn. 2:7, 8. f Jn. 14:15, 21; Ro. 13:8; 1 Jn. 2:24; 5:3. g 1 Jn. 2:22. h He. 10:32, 35.

⁹Ec'o vinek ri niqibij chi c'o más etamabel quiq'uin chirij ri tijonic richin ri Cristo, y xa man que ta ri!. Roma rije' xa pa ruq'uexel yejel-apo riq'uin ri Cristo, xa ye'el-el riq'uin. Re yebin c'a quere!, manek c'a ri Dios quiq'uin. Jac'a roj ri man nikaya' ta can ri tijonic ri richin ri Cristo, can c'o ri Tata'ixel y ri C'ajolaxel kiq'uin. ¹⁰Vi c'o jun xtapon chi'ivachoch y man ja ta ri tijonicⁱ richin ri Cristo ri ruc'uau-apo chive, man c'a tic'ul ni man tibij chuka' el chire: Ri Dios xtiton avichin. ¹¹Roma vi xtic'ul y xtirayij ronojel utzil pa ruvi!, can xtivejkalej' chuka' rix ri itzel tak rubanobal ri jun ri'.

Ri ruq'uisibel tak ch'abel

¹²Y c'o q'uiy ri ninvajo' ninbij chive.^k Pero man ninvajo' ta nintz'ibaj más chupan re carta re!. Roma can ninrayij yinapon na iviq'uin richin c'ari' ninbij chive, richin queri' ri kánima can ta quicoten nuna!^l

¹³Ri e ral ri avach'alal niquitek-el rutzil-avech. Re avach'alal re' can cha'on-vi roma ri Dios. Can que vi ri'.